

[唐]歐陽詢撰

藝文類聚



〔唐〕歐陽詢撰

汪紹楹校

藝文類聚

上海古籍出版社

藝文類聚卷第六十二

居處部二 宮 闕 臺 殿 坊

宮

世本曰禹作宮。釋名曰宮穹也。屋見垣上穹隆也。方言曰吳有館娃之宮。禮記曰儒有一畝之宮。環堵之室。大戴禮曰周時德澤和洽蒿茂大以爲宮柱者名曰蒿宮。毛詩曰定之方中作于楚宮。揆之以日作于楚室。又曰鼓鍾于宮聲聞于外。管子曰黃帝有合宮以聽政。穆天子傳曰天子升于崑崙之丘以觀帝之宮。越絕書曰美人宮周五百九十步土城者勾踐所習教美人西施鄭旦宮室。列子曰周穆王時西湖國有化人來王執化人之祫騰而上天。暨化人之宮構以金銀絡以珠玉出雲雨之上實爲清都紫微也。孟子曰齊宣王見孟子於雪宮。呂氏春秋曰武王勝殷靖箕子之宮。楚辭曰鱗屋兮龍堂。紫貝闕兮朱宮。史記曰騶子之燕昭王擁彗先驅請列弟子之座而受業築碣石室。○太平御覽一百七十三作宮親往師之。神異經曰東方有宮青石爲牆高三仞左右闕高百丈畫以五色門有銀榜以青石碧鏤題曰天地長男之宮西方有宮白石爲牆五色黃門有金榜而銀鏤題曰天地少女之宮西南方有宮以金爲牆門有金榜以銀。○太平御覽一百七十三銀下有鏤字題曰

天皇之宮.南方有宮.以赤石爲牆.赤銅爲門.有銀榜.題曰天地中女之宮.北方有宮.以黑石爲牆.題曰天地中男之宮.東南有宮.以黃石爲牆.以黃碧鍊.題曰天地少男之宮.西南有宮.以黃銅爲牆.題曰地皇之宮.十洲記曰.青丘山上有紫宮.天眞仙女多遊於此.又曰.方丈山上有琉璃宮.列仙傳曰.鉤翼夫人.齊人也.右手拳望色者云.東方有貴人氣.及到姿色甚偉.帝披其手.得一鉤.手尋下不拳.故名其宮曰鉤翼宮.說苑曰.楚使使聘齊.齊王享之梧宮.使者曰.大哉梧乎.王曰.江海之魚吞舟.況大國之樹也.漢武帝故事曰.上起明光宮.發燕趙美女二千人充之.建章未央長樂三宮.皆輦道相屬.懸棟飛閣.不由徑路.漢書曰.武帝六年冬.幸雍回中.春作首山宮.又曰.上祠神人于郊.○太平御覽一百七十三作交門宮.若有向坐拜者.作交門之歌.又曰.幸河東之明年正月.鳳皇集.設祠於所集處.得玉寶.起步壽宮.又曰.柏梁災.越巫勇之乃曰.越俗有火災.復起屋必以火.○太平御覽一百七十三作大用勝服之.於是起建章宮.爲千門萬戶.又曰.秦倚曲臺之宮.懸衡天下.衡秤也.言懸法度於其上也.

三

輔故事曰.桂宮周匝十里.內有光明殿.走狗臺.土山繁複道.橫北度.從宮中西上城.至神明臺.三輔黃圖曰.有夜光宮.望遠宮.照臺宮.蒲萄宮.棠梨宮.資陽宮.長平宮.黃山宮.望仙宮.長楊宮.集靈宮.萬歲宮.延壽宮.初○太平御覽一百七十三作祈.年宮通天宮.駁婆○御覽作婆.宮.東觀漢記曰.帝遺單于饗賜作樂百戲.上幸離宮臨觀.魏略曰.大秦國城中有五宮.相去各五十里.宮室皆以水精爲柱.食器亦

然。王隱晉書曰：高堂隆刻鄴宮屋材云，後若干年，當有天子居此宮。惠帝止鄴宮，治屋者土剝更泥，始見刻字，計年正合。**【詩】**梁簡文帝新成安樂宮詩曰：遙看雲霧中，刻角映丹虹。珠簾通曉日，金花拂夜風。欲知弦管處，來過安樂宮。周明帝過舊宮詩曰：玉燭調秋氣，金輿歷舊宮。還如過白水，更似入新豐。秋潭漬晚菊，寒井落疎桐。舉杯延故老，今聞歌大風。陳陰鏗新成安樂宮詩曰：新宮實壯哉，雲裏望樓臺。迢遞翔鵠仰，連翩賀雀來。重簷寒露宿，丹井夏蓮開。砌石披新錦，梁花畫早梅。欲知安樂盛，歌管雜塵埃。**【賦】**漢劉歆甘泉宮賦曰：軼陵陰之地室，過陽谷之秋城，迴天門而鳳舉，躡黃帝之明庭，冠高山而爲居，乘崑崙而爲宮。按軒轅之舊處，居北辰之闕中，背共工之幽都，向炎帝之祝融，封巒爲之東序，緣石闕之天梯。桂木雜而成行，芳盼嚮之依依，翡翠孔雀飛而翹翔，鳳皇止而集栖，甘醴涌於中庭兮，激清流之瀰瀰，黃龍遊而蜿蟺兮，神龜沉於玉泥。離宮特觀，樓比相連，雲起波駭，星布彌山，高巒峻阻，臨眺曠衍，深林蒲葦，涌水清泉，芙蓉菡萏，菱荇蘋蘩，豫章雜木，梗松柞棫，女貞烏勃，桃李棗櫟。魏卞蘭許昌宮賦曰：入南端以北眺，望景福之嵯峨，飛棟列以山峙，長途邈以委他，見巒櫨之交錯，覩陽馬之承阿，轉挾腋以相因，若流風之揚波，木無小而不礲，材靡隱而不華，懿采色而發越，瑋巧飾之繁多，雙轍承粉，丹梁端直，明牕列布，綺井劖甃，其陰則有望舒涼室，羲和溫房，隆冬御絺，盛夏重裳，同一宇之深邃，致寒暑於陰陽，脩欄蔭於階砌，崇棟拂乎旻蒼，綺組發華，翡翠生光，丹草周隅，靈木成行，非窈窕之至貴，孰能升於斯堂，坐金人於闢闔，列鍾虡於廣庭，天鹿軒翥以揚怒，師子鬱拂而

負楨珍果敷華蘭芷垂榮百璧照曜飛響應聲扣角則春氣至彈商則秋風征歷神芝之峻觀幸安昌之巍巍進鼓舞之祕妓絕世俗而入微興七盤之遞奏觀輕捷之翾翾或遲或速乍止乍旋似飛鳬之迅疾若翔龍之遊天趙女撫琴楚媛清謳秦箏慷慨齊舞絕殊衆妓並奏桷巧騁奇千變萬化不可勝知樂戲闌遊觀足登承光坐華幄論稽古反流俗退虛僞進敦朴寶賢良賤珠玉豈必世而後仁在時主之所欲魏楊脩許昌宮賦曰於是儀北極以邁撩希形制乎太微結雲閣之崔嵬植神木與靈草紛蓊蔚以參差爾乃置天臺於辰角列執法於西南築舊章之兩觀綴長廊之步欄重閨禁之窈窕造華蓋之幽深儉則不陋奢則不盈黎民子來不督自成於是天子乃具法服戒羣僚鍾鼓隱而雷鳴警蹕嘈而響起掩藹低徊天行地止以入乎新宮臨南軒而向春方負黼黻之屏風憑玉几而按圖書想往昔之興隆北齊邢子才新宮賦曰擬二儀而構路復法三山而起翼室何大廈之眈眈而斯干之秩秩豈西京之足偉故東都之所匹爾其狀也則瓊誦屈奇瀾漫陸離嵯峨崔嵬巉巖參差若密雲之乍舉似鵬翼之中垂布菱華之與蓮蒂咸反植而倒施若承露而將轉似含風而欲披土成黼黻木化蛟螭布紅紫之融泄閒朱黃之赫曠獸狂顧而猶動鳥將鳶而中疲木神水怪海若山祇千變萬化殊形異宜陰梁北注陽烏南施百楹列倚千櫨代支或據險而形固或居安而勢危【頌】漢王褒甘泉宮頌曰甘泉山天下顯敞之名處也前接大荆後臨北極左撫仁鄉右望素域其宮室也仍巖薛而爲觀壤抗岸以爲階壅波瀾而鱗坻馳道列以曲遠覽除閣之麗靡覺堂殿之巍巍徑落莫以差錯編玳

壇之文槐鏤螭龍以造牖采雲氣以爲楣神星羅於題鄂虹蜺往往而繞榱縵倏忽其無垠意能了之者誰竊想聖主之優遊時娛神而款縱坐鳳皇之堂聽和鸞之弄臨麒麟之域驗符瑞之貢詠中和之歌讀太平之頌宋孝武帝巡幸舊宮頌曰惟皇敬眷永慕徐京列裝青野動斬丹廷榮和首律景澤開年林坰發色川郊列泉沿泝遙衍登陟迴懸踐域負外卽宮臨山思甲陵寢歡結汾都眇懷沛濟勤念宛吾納壽遺老設飲先居堂序朝秀廷○全宋文六廷上有充字集闈梁沈約齊朝丹徒故宮頌曰聖祖神傑堯蹤漢烈岳峻雄圖天張武節墜命旣升霸略將騁清渭走烽濁河獻警特峭劍關憑深桂嶺彝章委闕禮樂沉河極壓傾構引溺危波盡物稱瑞窮靈委和玄精翼日丹羽巢阿【銘】後漢李尤永安宮銘曰合歡黃堂中和是遵舊廬懷本新果暢春候臺集道俾司星辰豐業廣德以協天人萬福來眇嘉娛永欣【表】梁沈約爲柳兗州世隆上舊宮表曰舊宮蘊靈千古合祥百代萬祇相祉八神鑿室事超齊甸義邁譙宮故能屬輦道於天階命帝闕於霄路實宜樹闕疏壤寫極上穹克播徽塵永光盛烈

闕

廣雅曰象魏闕也釋名曰闕闕也在門兩旁中央闕然爲道也周官曰太宰以正月懸治法於象魏禮記曰昔者仲尼與於蜡賓事畢出遊于觀之上喟然而歎仲尼之歎蓋歎魯也鄭言觀闕也左傳曰哀公三年司鐸火踰公宮季桓子至命藏象魏曰舊章不可忘象魏門闕也法令懸之故謂其書爲象魏

也。文子曰。老子云。身處江海之上。心在魏闕之下。史記曰。蓬萊方丈瀛洲。此三山在海中。諸仙人不死藥皆在焉。黃金白銀爲闕。又曰。建章宮東鳳闕。高二十丈。神異經曰。東南有石井。其方百丈。上有二石闕。俠東南面上。有蹲熊。有榜著闕。題曰地戶。又曰。東北大荒中。有金闕。高百丈。上有明月珠。徑三丈。光照千里。中有金階。西北入兩闕中。名天門。十洲記曰。崑崙山有水精闕。列仙○太平御覽一百七十九作女。此訛。傳曰。衛靈公與夫人夜坐。聞車聲轔轔。至闕而止。過闕復有聲。公問夫人曰。知此爲誰。夫人曰。此蘧伯玉也。公曰。何以知之。夫人曰。妾聞禮下公門。式路馬。今蘧伯玉衛之賢大夫也。敬於事上。必不闇昧廢禮。是以知之。公使人視之。果伯玉也。三輔舊事曰。未央宮東有蒼龍闕。北有玄武闕。應劭漢官儀曰。高祖既登帝位。銅陽固始細陽歲。遣雞鳴歌士常謳於闕下。漢官典職曰。偃師去宮三十五里。望朱雀闕。其上鬱樸與天連。魏志曰。明帝作凌霄闕。蜀志曰。譙周嘗聞杜瓊曰。昔周徵君羣。以爲當塗高者。魏也。其義何也。瓊答曰。魏闕名也。當塗言高。聖人取類言爾。關中記曰。未央宮東有青龍闕。北有玄武闕。漢書所謂北闕者也。建章宮圓闕臨北道。鳳在上。故曰鳳闕也。閻闥門內東出。有折風闕。一名別風闕。王隱晉書曰。漢末博士燉煌侯瑾。善內學。語弟子曰。涼州城西有泉水當竭。當有雙闕起。其上魏嘉平中。武威太守起學舍。築闕於此。賴○太平御覽一百七十九作瀨。下同。鄉記曰。老子廟前有兩石闕。大闕高九尺八寸。下三重石塼。闕邊各有子闕。山謙之丹陽記曰。太興中。議者皆言漢司徒許或墓闕。可徙施之。王茂弘弗欲。後陪乘出宣陽門。南望牛頭山兩峯。曰天闕也。

豈煩改作帝然之。鄧德明南康記曰。南康縣歸義山去縣七百里下有石城高數丈遠望嵯峨靈闕騰空故老謂之神闕。【詩】隋江總詠雙闕詩曰。象闕連馳道反宇照方疏刻鳳棲清漢圖龍入紫虛屢逢膏露灑幾遇祥煙初競言百尺麗寧方萬丈餘。【賦】魏繁欽建章鳳闕賦曰。築雙鳳之崇闕表大路以遐通上規圓以穹隆下矩折而繩直長楹森以駢停修桷揭以舒翼象玄圃之層樓肖華蓋之麗天當蒸暑之煖赫步北楹而周旋鷁鵬振而不及豈歸鴈之能翔抗神鳳以甄臺似虞庭之鑠鑠檀六翮以撫跡俟高風之清涼華鍾金獸列在南廷嘉樹蔽雲奇鳥哀鳴臺榭臨池萬種千名周櫨輦道屈繞紆縈。【銘】後漢李尤闕銘曰。皇上尊嚴萬姓載依國都攸處建設端闡表樹兩觀雙闕巍巍梁陸倕石闕銘曰。昔舜格文祖禹至神宗周變商俗湯黜夏政雖革命殊乎因襲揖讓異於干戈而晷緯冥合天人啓基○文選五十六作基克明俊德大庇生民其揆一也。在齊之季昏虐君臨威侮五行怠弃三正踏地無歸瞻烏靡託我皇帝拯之乃操斗極把鉤陳翼百神提萬福指麾而四海隆平下車而天下大定以爲象闕之制其來已遠春秋設舊章之教經禮垂布憲之文戴記顯游觀之言周史書樹闕之夢北荒明月西極流精海岳黃金河廷紫貝蒼龍玄武之制銅爵鐵鳳之工或以聽窮省寃或以布治懸法或表正王居或光崇帝里晉氏浸弱宋曆威夷禮經舊典寂寥無記鴻規盛烈堙沒罕稱乃假雙闕於牛頭託遠圖於博望有欺耳目無補憲章惟帝建國正位辨方周營洛涘漢啓岐梁居因業盛文以化光爰有象闕是惟舊章青蓋南洎黃旗東指懸法無聞藏書不紀大人造物龍德休否建此百

常興茲雙起，偉哉偃蹇狀矣。巍巍傍映重疊，上連翠微。布教方顯，挾日初暉。懸書有附，委篋如歸。
【表】梁沈約上建闕表曰：恭惟哲后舊章必修，眇矚前王後古爲貴。伏惟陛下欽咨故實，率由令典。昔在有晉，經創江左，邦訓莫釐，遠國多缺。萬雉之外，兩觀弗興。空指南峯，懸法無所。世歷三代，年將二百，非所以經世成務，垂業後昆。天德圓應，憲章自遠。詔匠人建茲象闕，俯藉愛禮之心，以申子來之願。式表端聞，儀刑萬國。使觀風而至，復聞正歲之典。遐想之士，少寄懷古之目。

臺

爾雅曰：四方而高曰臺，積土四方者。山海經曰：西王母之山有軒轅臺，射者不敢西向，畏軒轅之臺。歸藏曰：昔者夏后啓葬享神於晉之墟，作爲墇臺於水之陽。左傳曰：夏后啓有鈞臺之饗。在河南陽翟縣。又曰：楚子成章華之臺，以與諸侯落之。老子曰：九層之臺，起於累土。穆天子傳曰：盛姬，盛伯之子也，盛國名。天子賜之上姬之長，乃爲之臺。是曰重巖之臺。賈子曰：翟王使使者之楚，楚王欲誇之，饗客章華之臺三休，乃至於上。呂氏春秋曰：有娀氏有二佚女，爲九成臺，飲食必以鼓。王孫子曰：昔衛公坐重華之臺，侍御數百，隨珠照日，羅衣從風。史記曰：漢武帝起柏梁臺，高數十丈。又曰：寡婦清其先得丹穴而擅其利，清寡婦也能守其業，用財自衛。秦始皇以爲貞婦而客之，爲築女懷清臺。陸賈新語曰：楚靈王作乾谿之臺，百仞之高，欲登浮雲，窺天文。新序曰：魏王將欲爲中天之臺，許綰負插而入曰：聞大王將爲中天之臺，願加一力。臣聞天與地相去萬九千里，其趾當方一千里，盡

王之地不足爲臺趾。王默然罷築者。三輔故事曰。龍臺高六丈。去豐水縣五里。漢書曰。文帝嘗欲作露臺。召工計之。直百金。曰。百金中民十家之產。吾奉先帝宮室。常恐羞之。何以臺爲。三輔宮殿簿曰。長樂宮有臨華臺神仙臺。博物志曰。江陵有臺甚大。而唯有一柱。衆梁皆共此柱。魏志曰。黃初六年。築東巡臺。七年築九華臺。晉宮闕名曰。鄴有銅雀臺織室臺。陳留風俗傳曰。浚儀有師曠倉頡城。城上有列仙吹臺。鄴中記曰。鄴城西北立臺。皆因城爲基趾。中央名銅雀臺。北則冰井臺。又曰。西臺高六十七丈。上作銅鳳。牕皆銅籞。疏雲母幌。日之初出。乃流光曜。嵩高山記曰。山有玉女臺。云漢武帝見三仙玉女。因以名臺。益州記曰。鴈橋東有嚴君平卜處。土臺高數丈也。荊州圖記曰。江陵縣東有天井臺。飛軒光映。背邑面河。寔郊廓遊憩之佳處也。幽明錄曰。海中有金臺。出水百丈。結構巧麗。窮盡神工。橫光巖渚。竦曜星漢。吳地記曰。吳王闔閭十一年。起臺於姑蘇山。因山爲名。西南去國三十五里。春夏遊焉。後夫差復高而飾之。越伐吳。遂見焚。太史公云。余登姑蘇。望五湖。五湖去此臺二十餘里。戴延之西征記曰。官度臺。去青口澤六十里。魏武所造也。破袁紹於此。楊龍驤洛陽記曰。陵雲臺高二十三丈。登之見孟津。鄧德明南康記曰。雩都君山上有玉臺。方廣數丈。周迴盡是白石柱。柱自然石覆。如屋形也。四面多松杉。遙眺峨峨。嚮像羽人之館。風雨之後。景氣明淨。頗聞山上有鼓吹之聲。山都木客爲舞唱之節。廣州記曰。尉他立臺。以朝漢室。圓基千步。直峭百丈。螺道登進。頂上三畝。朔望升拜。號爲朝臺。伏採齊地記曰。秦始皇二十八年。至琅邪。大樂之。留三月。作琅

邪臺臺亦孤山也。然高顯出於衆山之上。**【詩】**晉陸機擬古詩曰：高臺一何峻，迢迢峻而安。綺牕出塵冥，飛階躋雲端。佳人撫瑤瑟，纖手清且閑。芳音隨風結，哀響馥若蘭。玉容誰能顧，傾城在一彈。**梁簡文帝琴臺詩**曰：蕪階踐昔徑，復愁鳴琴遊。音容萬春態，高名千載留。弱枝生古樹，舊石染新流。由來遞相歎，逝川終不收。**梁庾肩吾過建昌故臺詩**曰：魯國觀遺殿，韓城想舊臺。仲宣原隰滿，子建悲風來。夏蓮猶反植，秋窗尙左開。圖雲仍溜雨，畫水卽生苔。及君歡四望，知余悲七哀。**陳祖孫登宮殿名登高臺詩**曰：獨有相思意，聊敞鳳皇臺。蓮披香梢上，日明光正來。離鶴將雲散，飛花似雪迴。遙思竹林友，前牕夜夜開。**【賦】**魏文帝登臺賦序曰：建安十七年，春遊西園，登銅雀臺。命余兄弟並作其詞曰：登高臺以騁望，好靈雀之麗嫋。飛閣屆其特起，層樓儼以承天。步逍遙以容與，聊遊目於西山溪谷。紓以交錯，草木鬱其相連。風飄飄而吹衣，鳥飛鳴而過前。申躡躇以周覽，臨城隅之通川。**魏陳王曹植登臺賦**曰：從明后而嬉遊，聊登臺以娛情。見太府之廣開，觀聖德之所營。建高殿之嵯峨，浮雙闕乎太清。立冲天之華觀，連飛閣乎西城。臨漳川之長流，望衆果之滋榮。仰春風之和穆，聽百鳥之悲鳴。天工坦其既立，家願得而獲。呈揚仁化於宇內，盡肅恭於上京。唯桓文之爲盛，豈足方乎聖明。休矣美矣，惠澤遠揚。翼佐皇家，寧彼四方。同天地之矩量，齊日月之輝光。**晉陸雲登臺賦**曰：永寧中，巡幸鄴宮三臺。登高有感，乃作賦云。爾乃佇眄瑤軒，流目綺寮。中原方華，綠葉振翹。歷玉陛而容與，步蘭堂以逍遙。曲房繁而窈眇，長廊邈而蕭條。於是聊樂近遊，薄言儻佯。綺疏列於東序，朱戶立乎西廂。感舊物之咸

存悲昔人之云亡。憑虛檻而遠想。審歷命於斯堂。於是精疲遊倦。白日藏輝。鄙春登之有情。惡荆臺之忘歸。聊弭節而駕言。帳將逝而徘徊。晉孫楚韓王臺賦曰。酸棗寺門外。夾道左右。有兩故臺。訪諸故老。云韓王聽訟觀也。望韓王之故臺。尋往代之所營。雙闕碣以峻峙。貢雲氣而上征。歷千載而特立。顯妙觀於太清。薄邯鄲之叢臺。陋楚國之章華。邈峩嶃以亢極。豈岑樓之能加。至乃宮觀弘敞。增臺隱天。伐文梓於萬仞。發玉石於三泉。優倡角鳥鳥之聲。蛾眉戲白雪之舞。紛淫衍以低仰。翳脩袖而容與。晉盧諶登鄴臺賦曰。顯陽魄其顛隧。文昌鞠而爲墟。銅爵墮於臺側。洪鍾寢於兩除。奚帝王之靈宇。爲狐兔之攸居。【銘】後漢李尤雲臺銘曰。周氏舊居。惟漢襲因。崇臺嶒峻。上擬蒼雲。垂示億載。俾率舊章。人修其行。而國其昌。

殿

秦始皇本紀曰。始皇作前殿阿房。東西五百步。南北五十丈。上可以坐萬人。下可以建五丈旗。漢書曰。宣帝幸河東之明年。鳳皇集上林。乃作鳳皇殿。以答嘉瑞。又曰。班伯少受詩於師丹。大將軍王鳳薦伯。召見。宴昵殿中。誦說有法。拜爲中常侍。時上方向學。鄭寬中張禹。朝夕入說。尚書論語於金華殿中。詔伯受焉。三輔宮殿名曰。未央宮有麒麟殿。椒房殿。又曰。長樂宮前殿。宣德殿。通光殿。高明殿。漢宮閣名曰。長安有臨華殿。神仙殿。高門殿。朱鳥殿。曾城殿。宣室殿。永明殿。鳳皇殿。飛雲殿。昭陽殿。鴛鴦殿。鈞臺殿。合歡殿。蕭何參韓信並有殿。東觀漢記曰。明帝欲起北宮。尚書僕射鍾離意上

書諫出爲魯相後起德陽殿殿成百官大會上謂公卿曰鍾離尚書若在不得成此殿。范曄後漢書曰中平三年復修玉堂殿風俗通曰殿堂象東井形刻作荷菱菱水物也所以厭火。漢官典職曰德陽殿周旋容萬人激洛水於殿下。魏志曰青龍三年秋洛陽崇華殿災改名九龍殿。魏略曰青龍三年起太極殿洛陽故諸宮名曰洛陽南宮有却非殿銅馬殿敬法殿清涼殿鳳皇殿嘉德殿黃龍殿竹殿楊龍驥洛城記曰顯陽殿北有雲氣殿洛陽宮殿簿曰明光徽音式乾暉章含章建始仁壽宣光嘉福百福芙蓉九華流圃華光崇光並殿名戴延之西征記曰太極殿上有金井欄金博山金轆轤蛟龍負山於井上又有金師子在龍下摯虞決疑要注曰凡大殿乃有陛堂則有堵無陛也左城右平者以文搏相亞次城者爲階級也九錫之禮納陛以登謂受此陛以上。**賦**後漢李尤德陽殿賦曰開三階而參會錯金銀於兩楹入青陽而窺總章歷戶牖之所經連璧組之潤漫雜虬文之蜿蜒爾乃周閣迴通峻樓臨門朱闕巖巖嵯峨槩雲青瑣禁門廊廡翼翼華蟲詭異密采珍緝達蘭林以西通中方池而特立果竹鬱茂以蓁蓁鴻鴈沛裔而來集德陽之北斯曰濯龍蒲萄安石蔓延蒙籠橘柚含桃甘果成叢文槐曜水光映煌煌後漢王延壽魯靈光殿賦序曰魯靈光殿者蓋景帝程姬之子恭王餘之所立也遭漢中微自西京未央建章之殿盜賊奔突皆見壞壞而靈光巋然獨存意者豈非神明依憑支持以保漢室也賦曰瞻彼靈光之爲狀也則嵯峨嶧崿巍吁可畏乎其駭人也岩堯倜儻豐盈麗博嶸峩敞洞膠葛兮其無垠也於是乃歷夫大階以造其堂俯仰顧眄東西周章形

彩之飾.浩浩汗汗.飛流爛漫.素璧暎曜以月照.丹柱翕赩而電烻.鴻墻幌以燦闔.瑟蕭條以清冷.動滴瀝而成響.音雷應其若驚.耳嘈嘈以失聽.目曠曠而喪精.駢密石與琅玕.齊玉璫與璧瑛.於是詳察其棟宇.觀其結構.規矩應天.上憲觜陬.崛危雲起.嶽岑離婁.三閒四表.八維九隅.萬楹叢倚.磊柯相扶.爾乃懸棟結阿.天窗綺疏.發秀吐榮.菡萏披數.綠圓淵井.反植荷蕖.秀房紫的.窟咤垂珠.雲蒸藻悅.龍桷雕鏤.飛禽走獸.因木生姿.朱鳥舒翼以峙衡.騰蛇蟠虬而繞棟.白鹿子蜿於櫨櫨.蟠螭宛轉而承楣.狡兔跼伏於拊側.猿猴攀椽而相追.胡人遙集於上楹.儼雅跽而相對.神仙謌謌於棟閒.玉女窺窗而下照.圖畫天地.品類羣生.雜物奇怪.山神海靈.寫載其狀.託之丹青.千變萬化.事各繆形.隨色象類.曲得其情.上紀開闢.遠古之初.五龍比翼.人皇九頭.伏羲鱗身.女媧蛇軀.洪荒朴略.厥狀睢盱.漸臺臨池.增曲九城.屹然特立.的爾殊形.高經華蓋.仰看天庭.飛陛揭孽.緣雲上征.中坐垂景.俯視流星.千門相似.萬戶如一.巖突洞出.逶迤詰屈.周行數里.仰不見日.魏何晏景福殿賦曰.立景福之祕殿.備皇居之制度.爾乃豐層覆之耽耽.建高基之堂堂.羅疏柱之汨汨.肅抵鄂之鏘鏘.飛簷翼以軒翥.反宇轚以高驥.遠而望之.若摛朱霞而耀天文.近而察之.若仰崇山而載垂雲.爾乃開南端之豁達.張筭簾之輪幽.華鍾杌其高懸.悍獸仡其儻陳.爾其結構則修梁彩制.下褰上奇.枅梧複疊.勢合形離.葩如蜿虹.赫如奔螭.皎皎白閒.離離列錢.晨光內照.流景外熒.金楹齊列.玉鳥承跋.青瑣銀鋪.是爲閨闥.溫房承其東序.涼室據其西偏.開建陽則朱炎豔.啓金光則清風臻.清露瀼瀼.绿水浩浩.樹以嘉木.植以芳草.悠悠

玄黃。鯁鯁白鳥爾乃文以朱綠。飾以碧丹。點以銀黃。爍以琅玕。清風萃而成響。朝日曜而增鮮。魏韋誕景福殿賦曰。瞻大廈之穹崇。結增構而高驥。脩棟迪以虹指。飛甍竦而鳳翔。榱桷駢逼以星羅。軒檻曼延而悠長。伏應龍於反宇。乘流蘇以飄揚。於是周覽升降。流目詳觀。叢楹負極。飛檻承櫟。栱梧綺錯。粲悅鱗攢。芙蓉側植。藻井懸川。望舒涼室。羲和溫房。玄冬則暖。炎夏則涼。總寒暑於區宇。制天地之陰陽。又有外城金狄。詭貌殊姿。列于應門。肅有容威。若乃離殿別館。粲如列星。安昌延休。清宴永寧。美百號之特居。嘉休祥之令名。步雕輦以逍遙。時容與於蘭庭。又有教坊講肆。才士布列。新詩變聲。曲調殊別。吟清商之激哇。發角徵與白雪。音感靈以動物。超世俗以獨絕。然後御龍舟兮翳翠蓋。吳姬擢歌越女鼓枻。詠採菱之清謳。奏渌水之繁會。魏夏侯惠景福殿賦曰。周步堂宇。東西眷眄。採色光明。粲爛流延。素壁曉瀆。赫奕倩練。爾乃察其奇巧。觀其微形。嶽峯紆曲。盤牙欹傾。或夭矯而雲起。或詰屈而鑽繚。衆木附枝以連注。欒梧倚亞而相經。若乃仰觀綺窗。周覽菱荷。流彩的爍。微秀發華。纖莖葳蕤。順風揚波。含光內燭。婀嫋紛葩。曾櫨外周。棟桷內附。或因勢以連接。或邪詭以盤構。於是乎飛閣連延。馳道四周。高樓承雲。列觀若浮。挹朝露之華精。漱醴泉之清流。宋孝武華林清暑殿賦曰。若夫瑤樹未清。瓊室流炎。熏風夕烈。熾景晨嚴。高巒廢駕。遊衢輶轡。思延寒於夏室。豈徒聞於遺籍。伊涼燠之可變。粵在今之猶昔。密盼林梁。側眺池籞。起北阜而置懸湖。沿西原而殿清暑。編茅樹基。採椽成宇。轉流環堂。浮清浹室。關西櫨而鑿斜月。高東軒而望初日。粵乃炎精待戒。青祇將畢。濯禊在辰。風光明密。婉祥鱗

於石沼儀瑞羽於林術浮觴無屆展樂有時惟歡洽矣含歌受辭歌曰山懷風兮谷吐泉清潭邃兮遠氣宣符深情兮應遙心促千里兮測雲天宋江夏王劉義恭華林清暑殿賦曰構禦暑之清宮傍測景之西岑列喬梧以蔽日樹長楊以結陰醴泉湧於椒室迅波經于蘭庭葉芳芝以爭馥合百草以競馨飾丹壤以和璧加疏楯以連城至于朱明在運鬱夕靄農寒堂涼結清觀風臻覽茲宇之靈緯啓聖情以寤神豈宣曲之妄擬焉甘泉之足陳宋何尚之華林清暑殿賦曰逞綿瓦之虹梁列雕刻之華棊網戶翠錢青軒丹墀若乃奧室曲房深沉冥密始如易修終然難悉動微物而風生踐椒塗而芳質觴遇成宴暫遊累日却倚危石前臨濬谷終始蕭森激清引濁涌泉灌於基扈遠風生於楹曲暑雖殷而不炎氣方清而含育哀鵠唳暮悲猿啼曉靈芝被崖仙華覆沼【銘】後漢李尤德陽殿銘曰皇穹垂象以示帝王紫微之則弘誕彌光大漠體天承以德陽崇弘高麗苞受萬方內綜朝貢外俟遐荒

陳徐陵太極殿銘曰夫紫蓋黃旗揚都之王氣長久虎踞龍蟠金陵之地體貞固天居爽塏大寢尊嚴高應瑞門仰模營室歸于有德譬彼河圖傳我休明義同商鼎太極殿者法互○初學記二十四作氏象冗○初學記作冗王者之位以尊左平右城天子之堂爲貴往朝焜燶多歷年所世道隆平宜其休復監軍鄒子度啓稱卽日忽有一大梓柱從流來泊在後渚岸嵯峨容與若漢水之仙槎搖漾波濤似新亭之龍刹孤拔靈山允彰天祝昔梁氏承聖將圖繕修東虜窺江西胡犯畢定之方中亟興師旅揆之以日輒有災故是知秦人所止實漢祖而爲宮吳都佳氣乃元皇而斯宅千櫨赫奕萬栱凌層植綠芰而動